

**BOSNA I HERCEGOVINA
FEDERACIJA BOSNE I HERCEGOVINE
VLADA**

Prijedlog

ODLUKA

**O PRIHVATANJU ZADUŽENJA PO SPORAZUMU O FINANSIRANJU
IZMEĐU BOSNE I HERCEGOVINE I RAZVOJNE BANKE VIJEĆA
EVROPE (CEB) ZA REALIZACIJU PROJEKTA JAČANJA
ZDRAVSTVENOG SEKTORA (HSEP) - DODATNO FINANSIRANJE**

Sarajevo, juli 2013. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO OKVIRNOM SPORAZUMU O KREDITU IZMEĐU RAZVOJNE BANKE VIJEĆA EVROPE (CEB) I BOSNE I HERCEGOVINE ZA REALIZACIJU PROJEKTA JAČANJA ZDRAVSTVENOG SEKTORA (HSEP) - DODATNO FINANSIRANJE

I.

Prihvata se zaduženje Federacije Bosne i Hercegovine (u daljem tekstu: Federacija) po Okvirnom Sporazumu o kreditu između Razvojne banke Vijeća Evrope (u daljem tekstu: CEB) i Bosne i Hercegovine (u daljem tekstu: BiH) u iznosu do 5.500.000,00 EUR za realizaciju Projekta jačanja zdravstvenog sektora (Health Sector Enhancement Project - HSEP) - dodatno finansiranje, što iznosi 60 % od ukupno odobrenih sredstava za BiH koja iznose 9.200.000,00 EUR.

II.

Sredstva kredita iz tačke I. ove Odluke koristit će se za finansiranje Projekta jačanja zdravstvenog sektora. Primarni cilj projekta je jačanje zdravstvenog sektora putem restrukturiranja i jačanja primarne zdravstvene zaštite, uvođenjem porodične medicine, kao i jačanje procesa donošenja politike putem razvoja i implementacije sistema monitoringa i evaluacije učinka zdravstvenog sektora.

III.

Sredstva kredita iz tačke I. ove Odluke, odobravaju se Federaciji pod sljedećim uslovima:

Iznos kreditnih sredstava:	5.500.000,00 EUR
Rok otplate:	do 20 godina (uključen grace period)
Grace period:	do 5 godina
Valuta povlačenja:	EURO ili USD

Kamatna stopa:	bit će fiksirana posebno za svaku tranšu povlačenja, a zavisi od valute povlačenja svake tranše kredita, od iznosa svake tranše, kao i perioda otplate. Za povlačenja izvršena u EUR-ima primjenjivat će se EURIBOR, odnosno USD-LIBOR za povlačenja u USD.
----------------	---

IV.

Potvrđuje se da je razmatrana dokumentacija prihvatljiva za Federaciju, a posebno:

- Nacrt Okvirnog sporazuma o kreditu između CEB i BiH,
- Nacrt supsidijarnog ugovora između BiH i Federacije BiH.

V.

U periodu implementacije Projekta, u budžetu Federacije nije potrebno osigurati dodatna finansijska sredstva za sufinansiranje Projekta.

Projekt će implementirati Jedinica za implementaciju projekta, formirana pri Federalnom ministarstvu zdravstva.

VI.

Daje se saglasnost za zaključivanje Supsidijarnog sporazuma između Bosne i Hercegovine i Federacije za sredstva kredita iz tačke I. ove Odluke.

Za potpisivanje Supsidijarnog sporazuma ovlašćuje se Federalni ministar finansija - Federalni ministar financija.

VII.

Za realizaciju ove Odluke i izvještavanje zadužuje se Federalno ministarstvo finansija - Federalno ministarstvo financija i Federalno ministarstvo zdravstva, svako u okviru svoje nadležnosti.

VIII.

Implementacija Sporazuma iz tačke I. ove Odluke ne zahtijeva donošenje novih ili izmjenu postojećih zakona.

IX.

Ova Odluka stupa na snagu narednog dana od dana objavljivanja u "Službenim novinama Federacije BiH".

OBRASLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Osnovni razlog za donošenja ove Odluke je zaduženje Federacije Bosne i Hercegovine po osnovu kredita kod Razvojne banke Vijeća Evrope za Projekt jačanja zdravstvenog sektora (Health Sector Enhancement Project - HSEP) u iznosu od 5.500.000,00 EUR.

Donošenjem ove Odluke stvara se osnov za potpisivanje Supsidijarnog ugovora između Bosne i Hercegovine i Federacije Bosne i Hercegovine, kojim će se propisati uslovi za davanje kredita Federaciji, a koji će biti identični uslovima pod kojima Razvojna banka Vijeća Evrope odobrava kredit Bosni i Hercegovini za Projekt jačanja zdravstvenog sektora - dodatno finansiranje.

S obzirom da je dosadašnja implementacija Projekta pokazala poboljšan pristup Primarnoj zdravstvenoj zaštiti razvojem i širenjem ambulanti porodične medicine na cijeloj teritoriji Federacije, te se poboljšao kvalitet zdravstvene zaštite, javila se potreba za nastavkom finansiranja, s ciljem jačanja i proširivanja primarne zdravstvene zaštite.

Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod Razvojne banke Vijeća Evrope.

Tačkom II. potvrđuje se namjena utroška sredstava kredita.

Tačkom III. precizirani su uslovi kredita.

Tačkom IV. potvrđuje se da je dokumentacija parafirana tokom pregovora sa Razvojnomo bankom Vijeća Evrope prihvatljiva za Federaciju BiH, što je uslov da Bosna i Hercegovina i Razvojna banka Vijeća Evrope pristupe potpisivanju Sporazuma o finansiranju.

Tačkom V. se definira da nije potrebno osigurati dodatna sredstva u Budžetu Federacije za ovu namjenu i implementator Projekta.

Tačkom VI. daje se saglasnost za potpisivanje Supsidijarnog sporazuma sa Bosnom i Hercegovinom i ovlaštenje federalnom ministru finansija-federalnom ministru financija da u ime Federacije potpiše isti.

Tačkom VII. se za realizaciju ove Odluke zadužuje Federalno ministarstvo finansija - Federalno ministarstvo financija i Federalno ministarstvo zdravstva, svako u okviru svoje nadležnosti.

Tačka VIII. potvrđuje da za implementaciju Sporazuma o finansiranju nije potrebno donijeti nove ili izmijeniti postojeće zakone.

Tačka IX. propisuje stupanje na snagu ove Odluke.